



經籍典第一卷

經籍總部彙考一

上古

太昊伏羲氏始作八卦造書契 按易經繫辭古者包犧氏之王天下也仰則觀象於天俯則觀法於地觀鳥獸之文與地之宜近取諸身遠取諸物於是始作八卦以通神明之德以類萬物之情

本義王昭素曰與地之間諸本多有天字

上古結繩而治後世聖人易之以書契百官以治萬民以察蓋取諸夬

本義明決之意 大朱子曰上

古結繩而治後世聖人易之以書契天下事有古未之爲而後人爲之固不可无者此類是也

進齋徐氏曰上古民淳事簡事之大小唯結繩以識之亦足以爲治至後世風媮俗薄欺詐日生而書契不容不作矣書文字也契合約也言有不能記者書識之事有不能信者契驗之取明決之義蓋夬乃君子決小人之卦而造書契亦所以決去小人之僞而防其欺也

按禮記禮運河出馬圖

正義按中候握河紀伏羲氏有天下龍馬負圖出於河遂法之畫八卦

按史記三皇本紀補伏羲氏生有聖德仰則觀象於天俯則觀法於地旁觀鳥獸之文與地之宜近取諸身遠取諸物始畫八卦以通神明之德以類萬物之情造書契以代結繩之政

按通鑑外

紀伏羲氏造八卦始作三畫以象二十四氣因而重之爻象備矣

按古史考庖羲作卦始有筮

炎帝神農氏演八卦作連山著神農諸篇

按周禮春官太卜掌三易之灋一曰連山

疏皇甫謐

記云夏人因炎帝曰連山

按史記索隱炎帝重八卦爲六十四爻

按漢書藝文志神農二十篇神農兵法一篇神農大幽

五行二十七卷神農教田相土耕種十四卷神農雜子技道二十三卷

按上古之書真贋莫辨雖前史載之亦多疑其爲後人假

託之言然觀連山本草方書等皆有左驗則當時之著書信矣特後世所傳多非其舊爾姑存其概以著經籍之始至路史稱天皇氏有靈書八會注引真誥八會文章之祖爲龍鳳之章雲篆之迹其說尤荒誕不足據入於外編今但以伏羲氏有書契之後爲斷

按三國志魏少帝本紀甘露元年夏四月丙辰帝幸太學問諸

儒曰易之書其故何也易博士淳于俊對曰包犧因燧皇之圖而制八卦神農演之爲六十四名曰

連山似山出納氣連天地也

按路史炎帝紀帝神農氏乃命司怪主卜巫咸巫陽主筮於是通

其變以成天地之文極其數以定天下之象八八成卦以酬酢而祐神以通天下之志以定天下之

業謂始萬物終萬物者莫盛乎艮艮東北之卦也故種艮以爲始所謂連山易也爰問於太乙小子稽太始說玉冊著其本草乃立方書

種音蟲
複也

按玉海神農重卦說注京房引夫子曰神農重乎

八純

黃帝軒轅氏得河圖洛書作歸藏著書置史

按周禮春官太卜掌三易之瀝二曰歸藏

注杜子

春云歸藏黃帝

按竹書紀年黃帝五十年秋七月庚申鳳鳥至帝祭于洛水

注庚申天霧三日三夜晝昏帝問天

老力牧容成曰於公何如天老曰臣聞之國安其主好文則鳳凰居之今鳳凰翔于東郊而樂之其鳴音中夷則與天相副以是觀之天有嚴教以賜帝也霧旣降遊于洛水之上得圖書焉龍圖出河龜書出洛赤文篆字以授軒轅

按漢書藝文志黃帝四經四篇黃帝銘六篇黃帝君臣十篇雜黃帝五十八篇黃帝太素二十篇黃帝說四十篇黃帝十六篇圖三卷黃帝雜子氣三十三篇黃帝陰陽二十卷黃帝內經十八卷黃帝雜子步引十二卷

按黃帝書篇尤多假託尤衆猶今之所謂三墳雖明知出於後人之手亦不欲沒其名以存古之遺意爾

按晉書天文志黃帝受

河圖始明休咎

按通志蒼頡石室記有二十八字在蒼頡北海墓中土人呼爲藏書室

按路史黃帝紀黃帝有熊氏河龍圖發洛龜書成於是正乾坤分離坎倚象衍數以成一代之宜謂土爲祥乃重坤以爲首所謂歸藏易也故又曰歸藏氏

按列子力命篇黃帝之書六

按說

文黃帝之史蒼頡見鳥獸蹠吭之跡初造書契

按蒼頡爲黃帝史官藝文志又有孔甲盤盂二十六篇亦云孔甲黃帝史

三皇之世有三墳之書

按周禮春官外史掌三皇五帝之書

注楚靈王所謂三墳五典

按左傳昭公十二年楚子狩於州來左史倚相趨過王曰是良史也是能讀三墳五典八索九丘

按書經孔安國序伏羲神農黃帝之書謂之三墳言大道也

按毛漸三墳序春秋左氏傳云楚

左史倚相能讀三墳五典八索九丘孔安國敘書謂伏羲神農黃帝之書謂之三墳言大道也漢書

藝文志錄古書爲詳而三墳之書已不載豈此書當漢而亡與元豐七年予奉使西京巡按屬邑歷

唐州之泌陽道無郵亭因寓食於民舍有題於戶三墳書某人借去亟呼主人而問之曰古之三墳

也某家實有是書因命取而閱之三墳各有傳墳乃古文而傳乃隸書觀其言簡而理暢疑非後世

之所能爲也就借而歸錄間出以示好事往往指爲僞書然考墳之所以有三蓋以山氣形爲別山

墳言君臣民物陰陽兵象謂之連山氣墳言歸藏生動長育止殺謂之歸藏形墳言天地日月山川雲氣謂之乾坤與先儒之說三墳特異皆以義類相從曲盡天地之理復有姓紀皇策政典之篇文辭質略信乎上古之遺書也引征引政典曰先時者殺無赦不及時者殺無赦孔氏以爲夏后爲政之典籍頗與書合豈後人之所能僞耶世人徒以此書漢時已亡非後世所宜有且尙書當漢初重購而莫得武帝時方出於屋壁間詎亦可指爲僞哉予考此書旣篤信之將以詒諸好事君子故爲之敘云

按今所傳三墳書真僞未有確據以周禮左傳所云姑識於此以示傳疑之意

五帝之世有五典之書有五帝之史 按書經孔安國序少昊顓頊高辛唐虞之書謂之五典言常道也先君孔子生于周末討論墳典斷自唐虞 按三國吳志薛瑩傳右國史華覈上疏曰五帝三王皆立史官敘錄功美垂之無窮

陶唐氏

帝堯陶唐氏頒曆書受河圖作堯戒一卷得古詩于童子 按書經堯典乃命羲和欽若昊天曆象

日月星辰敬授人時

蔡傳曆所以紀事之書

按禮記禮運河出馬圖

正義

案中候握河紀堯時受河圖龍銜赤文綠色形象馬

按隋書經籍志堯戒舜禹一卷

見識緯

按列子仲尼篇堯治天下五十年游于康衢聞兒童謠曰

立我烝民莫匪爾極不識不知順帝之則堯問誰教爲此言兒童曰我聞之大夫問大夫大夫曰古

詩也

按韋續字源堯因靈龜負圖作龜書

按玉海堯卽政七十年受河圖

有虞氏

帝舜有虞氏命官職典禮樂歌詩著書受圖置史

按書經舜典帝曰咨四岳有能典朕三禮兪曰

伯夷帝曰兪咨伯汝作秩宗

正義

此時秩宗卽周禮之宗伯也

帝曰夔命汝典樂教冑子

孔傳

冑長也謂元子以下至卿大夫子弟以歌詩蹈之舞之教長國子中

和祇庸孝友

詩言志歌永言聲依永律和聲八音克諧無相奪倫神人以和

按尙書釋文虞書凡十六篇十

一篇亡五篇見存

按尙書正義堯典雖唐事本虞史所錄以五帝之末接三王之初由舜史勒

成一家可以爲法上取堯事下終禪禹皆舜史所錄

按大戴禮云伯夷虞史豈以秩宗而兼爲史官者耶

按尙書大傳舜

時俊又百工相和而歌卿雲

按史記樂書昔者舜作五弦之琴以歌南風

注王肅曰南風育

養之詩也

按玉海舜在位得益地圖遂廣黃帝九州爲十二州

按玉海引帝王世紀及集仙錄皆言西王母慕舜德獻益地圖其說近誕至云廣九州爲十二

州則益地圖之說殆非無據茲削其誕者存其足據者以爲考古者之一證云

夏后氏

夏后氏有夏書政典夏易洛書小正大含山海經諸書

按尙書禹貢蔡傳夏禹有天下之號也書

凡四篇禹貢作於虞時而繫之夏書者禹之王以是功也

引征政典

注

夏后爲政之典籍若周官六卿之政治典也

五子之歌有典有則

注

典謂經籍

洪範天錫禹洪範九疇

注

天與禹洛出書神龜貢之而出列於背有數至於九禹遂因而第之以

成九類

正義

漢書謂爲九章劉歆以爲禹治洪水錫洛書法而陳之洪範是也

按周禮春官太卜掌三易之灋一曰連山

訂

鄭鍔曰連山以艮爲首夏人之易其卦艮上艮下故

曰連山言如山之相連也

按禮記禮運孔子曰我欲觀夏道是故之杞而不足徵也吾得夏時焉

注鄭元曰得夏四時之書

其存者有小正

按史記夏本紀孔子正夏時學者多傳夏小正云

按漢書藝文志大畜三十七篇

見雜家注

傳言禹之所作其文似後世語師古曰畜古禹字

山海經十三篇

見形法

按帝王世紀禹觀於河始受圖

按論衡禹主治水益主記異物海外山

表無遠不至以所聞見作山海經

殷

殷有商書商頌商易諸書

按書經湯誓蔡傳契始封商以爲有天下之號書凡十七篇

按詩

經商頌朱子集傳契爲舜司徒而封於商傳十四世而有天下其後武王封微子啟於宋其後政衰

商之禮樂日以放失七世至戴公時大夫正考甫得商頌十二篇於周太師歸以祀其先王至孔子

編詩而又亡其七篇然其存者亦多闕文疑義

按周禮太卜掌三易之灋二曰歸藏

訂鄭鐸

曰歸藏以坤爲首商人之易其卦坤上坤下故曰歸藏言如地道之包含萬物所歸而藏也

周

周制天官之屬司書掌版圖地官司徒掌建邦土地之圖以六藝教萬民春官之屬大師掌六詩大卜掌三易大史等掌內外古今之書秋官之屬小行人掌五物各爲一書又命樂正等立詩書禮樂之教以造士 按周禮天官司書掌邦之六典八灋八則九職九正九事邦中之版土地之圖

注司書主會計之簿書者書冊籍也邦中之版以考人民之數土地之圖以考邦國之數然司書但掌其書而已

地官大司徒之職掌建邦之土地之圖與其人民之數以佐王安擾邦國以天下土地之圖周知九州之地域廣輪之數辨山林川澤丘陵墳衍原隰之名物而辨其邦國都鄙之數制其畿疆而封溝之設其社稷之遺而樹之田主各以其野之所宜木遂以名其社與其野 以鄉三物教萬民而賓興之三日六藝禮樂射御書數 保氏養國子以道乃教之六藝一曰五禮二曰六樂三曰五射四曰五馭五曰六書六曰九數 春官大師教六詩曰風曰賦曰比曰興曰雅曰頌瞽矇諷誦詩掌

九德六詩之歌以役大師 大卜掌三易之瀝一曰連山二曰歸藏三曰周易其經卦皆八其別皆

六十有四

注

杜子春云連山宓犧歸藏黃帝

疏

近師皆以爲夏殷周

訂

鄭鏐曰周易以乾爲首周

人之易其卦乾上乾下名曰周易如天覆無不周而變易無窮也

大史掌建邦之六典以逆邦國之治掌瀝以逆官府之治掌則以逆都鄙之治凡辦法者攷焉不信

者刑之凡邦國都鄙及萬民之有約劑者藏焉以貳六官

合解

大史史官之長主藏書者六典大師

掌之大史助之瀝卽八瀝則卽八則蓋大史以掌書爲職典瀝則之書皆其所職焉故也凡邦國

官府都鄙有爭其舊典是非者必就大史考之不信大史之瀝則以刑治之一云與其所藏不合

者則治以刑也約盟誓也劑券書也皆藏其書于大史也貳猶副也約劑之書其正在六官其副

在大史

小史掌邦國之志奠繫世辨昭穆

注

鄭司農云志謂記也春秋傳所謂周志國語所謂鄭書之屬

是也史官主書故韓宣子聘于魯觀書太史氏繫世謂帝繫世本之屬是也

內史掌王之八枋之瀝及國令之貳

合解

上所制而下守之爲瀝上所命而下稟之爲令皆著之於

書內史則掌其副貳也

凡四方之事書內史讀之

疏

諸侯凡事有書奏白於王內史讀示王

內史掌書王命遂貳之

合解

王言之出爲命如後世之制誥內史書於策而頒之又書副本而藏之

以待有所考也

外史掌書外令

注

王令下畿外

合解

外令謂王命頒於外國者

掌四方之志

注

志記也謂若魯之春秋晉之乘楚之檮杌

掌三皇五帝之書

訂義

李嘉會曰書斷自皇帝以下大道常道所可備記者此後凡有書莫不兼掌

夏商周所記不言可知

王昭禹曰上以攷古昔之所行

黃氏曰必掌皇帝書者凡王之命皆

當聯次於尙書也漢御史掌蘭臺祕書其遺意也

掌達書名于四方

注

謂若堯典禹貢達此名使知之古曰名今曰字使四方知書之文字得能讀

之

訂義

黃氏曰皇帝書名在四方久矣何以達爲朝廷常有書周書自泰誓之後皆是至東遷猶有

書四方未知朝廷制作之意故以其名達之

王氏曰書名者字也字所以正名百物故謂之名

鄭鏐曰四方言語不同上世音讀與後世亦異將欲使天下誦讀之際無東西南北之訛無古語今言之異則書之名不可以不達達之于四方欲使之皆同也大行人九歲諭書名蓋外史達之九歲之久慮其不一又使行人諭之愚案黃氏以書名爲古書達其名以廣帝王之道王氏以書名爲今之字書亦通但與上下文恐不相協

若以書使于四方則書其令

注書王令以授使者

訂義

王昭禹曰以書使于四方外史書其令則

掌外令故也

黃氏曰令猶今言制敕也書猶今言制書敕書也易氏曰亦所以明王政之所

從出

鄭鏐曰書名旣正道德乃一風俗乃同其有不同遣使以正之因書而使故曰以書使四

方也書其書使之令以爲證知其國書名之不正天子曾遣使以正之愚案古者邦國之書皆

錫於王其國已有此書惟達其名使天下知一人所重者在此其國未有此書若遣使以頒之必

書其令使天下知一人所錫者在此於是邦國無私書天下無異學

史掌贊書

注

王有命當以書致之則贊爲辭若今尙書作詔文

合解

御猶侍也侍御于君之史官

也有王命則贊內史外史而書之

秋官小行人掌五物者及其萬民之利害爲一書其禮俗政事教治刑禁之逆順爲一書其悖逆暴亂作厯猶犯令者爲一書其札喪凶荒厄貧爲一書其康樂和親安平爲一書凡此五物者每國辨異之以反命于王以周知天下之故

通考

馬端臨曰按成周之時自太史以至小行人皆掌官府之

典籍者也其名數亦多今除寶訓及太平六典之外亦無攷者矣

按禮記王制樂正崇四術立四教順先王書詩禮樂以造士春秋教以禮樂冬夏教以詩書 文王世子凡學世子及學士必時春誦夏弦大師詔之瞽宗秋學禮執禮者詔之冬讀書典書者詔之禮在瞽宗書在上庠

敬王之世孔子序書傳禮記刪詩正樂贊易修春秋著孝經 按史記孔子世家孔子自楚反乎衛年六十三魯哀公六年也孔子去魯凡十四歲而反乎魯魯終不能用孔子孔子亦不求仕孔子之時周室微而禮樂廢詩書缺追迹三代之禮序書傳上紀唐虞之際下至秦穆編序其事曰夏禮吾能言之杞不足徵也殷禮吾能言之宋不足徵也足則吾能徵之矣觀夏殷所損益曰後雖百世可知也

始作翕如縱之純如皦如繹如也以成吾自衛反魯然後樂正雅頌各得其所古者詩三千餘篇及至孔子去其重取可施於禮義上采契后稷中述殷周之盛至幽厲之缺始於衽席故曰關雎之亂以爲風始鹿鳴爲小雅始文王爲大雅始清廟爲頌始三百五篇孔子皆弦歌之以求合韶武雅頌之音禮樂自此可得而述以備王道成六藝孔子晚而喜易序彖繫象說卦文言讀易韋編三絕曰假我數年若是我於易則彬彬矣孔子以詩書禮樂教弟子蓋三千焉身通六藝者七十有二人如顏濁鄒之徒頗受業者甚衆 魯哀公十四年春狩大野叔孫氏車子鉏商獲獸以爲不祥仲尼視

之曰麟也取之曰河不出圖雒不出書吾已矣夫君子病沒世而名不稱焉吾道不行矣吾何以自見於後世哉乃因史記作春秋上至隱公下訖哀公十四年十二公據魯親周約其文辭而指博故吳楚之君自稱王而春秋貶之曰子踐土之會寔召周天子而春秋諱之曰天王狩於河陽推此類以繩當世貶損之義後有王者舉而開之春秋之義行天下亂臣賊子懼焉孔子在位聽訟文辭有可與人共者弗獨有也至於爲春秋筆則筆削則削子夏之徒不能贊一辭弟子受春秋孔子曰後世知丘者以春秋而罪丘者亦以春秋

按春秋魯哀公六年爲敬王三十一年哀公十四年爲敬王三十九年

按孝經緯孔子云

欲觀我褒貶諸侯之志在春秋崇人倫之行在孝經 按文獻通考孔子生於周末觀史籀之繁文懼覽者之不一遂乃定禮樂明舊章刪詩爲三百篇約史記而備春秋讚易道以黜八索述職方以除九丘討論墳典斷自唐虞以下訖于周

秦

始皇三十四年下令焚書偶語詩書者棄市 按史記始皇本紀三十四年始皇置酒咸陽宮博士七十人前爲壽僕射周青臣進頌曰他時秦地不過千里賴陛下神靈明聖平定海內放逐蠻夷日月所照莫不賓服以諸侯爲郡縣人人自安樂無戰爭之患傳之萬世自上古不及陛下威德始皇悅博士齊人淳于越進曰臣聞殷周之王千餘歲封子弟功臣自爲枝輔今陛下有海內而子弟爲匹夫卒有田常六卿之臣無輔拂何以相救哉事不師古而能長久者非所聞也今青臣又面諛以重陛下之過非忠臣始皇下其議丞相李斯曰五帝不相復三代不相襲各以治非其相反時變異也今陛下創大業建萬世之功固非愚儒所知且越言乃三代之事何足法也異時諸侯並爭厚招游學今天下已定法令出一百姓當家則力農工士則學習法令辟禁今諸生不師今而學古以非

當世惑亂黔首丞相臣斯昧死言古者天下散亂莫之能一是以諸侯並作語皆道古以害今飾虛言以亂實人善其所私學以非上之所建立今皇帝并有天下別黑白而定一尊私學而相與非法教人聞令下則各以其學議之入則心非出則巷議夸主以爲名異取以爲高率羣下以造謗如此弗禁則主勢降乎上黨與成乎下禁之便臣請史官非秦紀皆燒之非博士官所職天下敢有藏詩書百家語者悉詣守尉雜燒之有敢偶語詩書棄市以古非今者族吏見知不舉者與同罪令下三十日不燒黥爲城旦所不去者醫藥卜筮種樹之書若欲有學法令以吏爲師制曰可

漢

高帝元年冬十月蕭何盡收秦丞相府圖籍文書 按史記高祖本紀不載 按漢書高祖本紀云云

惠帝四年三月甲子除挾書律 按史記惠帝本紀不載 按漢書惠帝本紀云云

文帝 年始置五經博士 按史記漢書文帝本紀皆不載 按後漢書翟酺傳酺之爲大匠上言孝文皇帝始置一經博士武帝大合天下之書而孝宣論六經於石渠學者滋盛弟子萬數